



Dularchand Yadav tepsetba ken o nung
JDU candidate Anant Singh puogo

Williamson T20 asaya
nungi anisüngzüker



UriamghatnungNaganungeranemalungkakaiter

Guwahati, November 2, 2025

(Agencies): October 29 nü Assam-Nagaland arrtsülen Rengma Forest Range nung Naga nungeri amakba sülen Uriamghat area nung alirtem jashiteper.

Assam sorkar aser iba tesem nung mapa lemozüka aliba neutral security forces ajanga tejak repranga inyaksangshir ta iba tesem nung alirtemi aitsür.

Nübortemi lungkak aitba sülen 142 CRPF nungi Sector Commandant Euithuliu Newmai mapa belenogo.

State sorkari teinyaktsü tim meinyaker aser arrtsülen nisung, ali aser kiojen kümzüka meyuteter ta nübortemi aitsür.

Assam sorkari tawa nisungtem meindokba tesemtem nung ozüng alema inyaksangshirtemi Uriam saplings meyirjang aika leptoktsüogo ta osang angazüker. Forest Department-i

Uriamghat Sonaribil area nung süngdongtem atemba raksatsüogo. Iba mapa nung Nagaland administration ketdangsürtemi shilem agiogo ta nübortemi aitsür.

Honibarnü Dhansiri Subdivisional Students' Union (DSSU)-i Sarupathar nung mener lungkak aitogo aser state sorkari arrtsülen alirtemi kümzüka meyutetba atema parnoki aitsü.

Lungkak aitertemi "Solve the Assam-Nagaland border issue permanently," aser "Protect the lives and land of Assam's border dwellers" amala tezülubatam amer shilem agi.

DSSU lennirtemisa state aser centre sorkartem dang inter-state arrtsülen teti atema yimjung bener arutsüba mapa inyaktsü ayongzüko. Sorkartemi mapa shitak meinyakra iba tesem nung mepetmesü tensa ajurutsü ta parnokisa tekümdangtsü shiogo.

COTU-iDailiyimtsüngnungatalokbajangjatsür

Imphal, November 2, 2025

(Agencies): Daili Village nung GPRN Ato Kilonser agizükba mapang poster raksatsüba aser firecracker apokba atema sasaa bilemer aser aitsür ta Committee on Tribal Unity (COTU)-i metetdaksüogo.

Iba tatalokba atema Naga People's Organisation (NPO)-i sangdong ka agütsüba sülen COTU-i iba osang lemsatep.

Mejangjatetba nisung kari ibala mapa inyakba ya lokti kati aser talisa Kuki-Zo nunger ajungaim inyakba ama mezüngshitsüla. NPO-i tebilemtsü abenba agizüker saka tanga kin lennirtem mesüra noksatem sensatsüba ajanga Kuki-Zo nunger kecha majangzüker aser ibala inyakyim pusema menungiter ta

COTU-i ashi.

Benjung mapang Kuki-Zo nunger tesemtem nung firecrackers aser loudspeakers noktanga lir anungji iba tatalokba ya ozüi inyak ta asübaji tiyazü aser kuli kecha mali tya COTU-isa metetdaksü.

NPO aser tanga civil society groups-i kulitem mejangja tashi kin dak rangloker mejembitsü ayongzüker. Ibala tai osangtsüsang ajanga kidanger kintem tsüngda yimjung aser tesentaktep raksatsü akok ta COTU-isa ashi.

Item tatalokba ya onoki bushitsü aser ochi jungkai adokdaksütsü aser onoki tanga kintem den yimjung, telongjem aser kati ka akhümtsübutepa dang aotsü ta parnokisa ashi.

Armed Forces-i Arunachal nung "Poorvi Prachand Prahar" agitsü

Guwahati, November 2, 2025

(Agencies): Arunachal Pradesh kübok Mechuka nung Indian Army, Navy, aser Air Force külemi "Poorvi Prachand Prahar" agitsü.

Iba sentong ya tri-service exercise ka lir aser Eastern sector nung war-fighting, technological adaptation, aser operational coordination sayutsü.

Armed Forces' ajanga land, air, aser maritime fronts nung raratsü renema lir ta sayutsü atema iba exercise agitsü ta Defence spokesperson Lt Col

Mahendra Rawat-i ashi.

Iba exercise nung Special Forces, unmanned systems, precision equipment, aser networked operations centres nung temulung agütsütsü ta pai ashi.

"Sepaitem tendangtsü atema Revised Tactics, Techniques, and Procedures (TTPs) agitsü" ta Rawat-isa shisem.

Exercise Bhala Prahar (2023) aser Exercise Poorvi Prahar (2024) takok ngua agiba sülen "Poorvi Prachand Prahar" agitsü ta Lt Col Rawat-isa metetdaksü.

NPF-i Naga nunger maitsü aser sobaliba kümzüka ayur: Dr. Rio



Dr. Neiphiu Rio

Dimapur, November 2, 2025

(TYO): "NPF ya Naga nunger maitsü aser sobaliba tangatetbatem kümzüka atuba telok ka lir aser regional political party ana ka küma lokepba ta Tsüngrem taochi aser temulungtetba ajanga lir" ta Chief Minister aser NPF President, Dr. Neiphiu Rio-i ashi.

NPF Central Office Headquarters, Kohima nung Secretary General atema reception program nung "NPF-i regional unity aser Naga maitsü kümzüka ayutsü" Dr. Rio-i ashi.

Paisa 1963 nung tenzükba nungi 1964 nung mezügbuba election agia NPF party aruba lemsatep. "Tsüngrem taochi, tamangertem sarasadem aser taintem shisatsü ajanga party len ania aruogo" ta Dr. Rio-i ashi.

Naga nunger nütsüng yongsük ishika dang saka shingaia asenok madak yimsü masü. Bengal Eastern Frontier Regulation Act of 1873 aser Article 371(A) ajanga Naga lima, sobaliba aser customary laws maneni kümzüka lir ta pai metetdaksü.

"Onok ya Naga nunger

temetentem kümzüka ayutsü atema lir. Asenok Constitution of India kübok lir aser 16-Point Agreement nung lateta aliba onük aika ano meinyaktet lir anungji asenoki item asoshi noktaksüla" ta Rio-i ashi.

2002 nung Nagaland People's Front tentet aser iba sülen Manipur o Arunachal Pradesh nungi Naga nunger dendaktsütsü atema Naga People's Front (NPF) ta tenüng melen. Onoki NPF tentetdang onok ket temulungtetba dak alaka kecha maliasü ta pai ashi.

Tsüngremer temoatsü aser nübortem teyari ajanga onoki iba party yangertet ta paisa shisem.

Tawa NPF aser NDPP MLA tem ka akümba ya otsüsütsü mapa ka aser iba ajanga Naga nunger ka ta asüba sayur. MLA 2 den MLA 32 loktepbaji telongjem aser nükjiong aliba sayur ta Dr. Rio-isa metetdaksü.

Nagaland state emblem nung Ashoka Chakra nungi Mithun melenba ya Naga nunger konang aser longjema aliba tamaitü lir. Asen state motto tasen nung Telongjem ajanga asenok tashi aser Ka akümba

ajanga asenok tashi itdaksür aser akhümtsübu angur ta ratettsür, ta paisa ashi.

"Regional party ka nung adenbaji tezüba masü, iba ya khuret ka aser bendanga agütsüba lir. Saka Naga nunger atema noktaksübaji asenok tebilemtsü khuret lir. Party züngsemtem dang kanga pelar aser NPF nung Tir 10 buba ama ni anisüngzüksü, saka lanu pututemi NPF senmang, tangatetba aser tesayubatam mesamadaktsüi bener aotsüla" ta Dr. Rio-isa ashi.

"Party lennirtem kati ka sempatepba ajak amadoktsüla aser tasen kümshir inyaka aotsüla. Party yagi kijatem masü saka nübortem tenzüker anungji nübör tenzüksübaji asen tongtipangba mapa asütsüla" ta paisa ayongzü.

"NPF ya elections nung toktepba political party ka dang masü saka Naga nunger asoshi movement ka lir aser nisung ajaki iba tebilemtsü khuretji abentsüla" ta MLA & NPF Secretary General Achumbemo Kikon-i ashi.

Paisa party züngsem ajak dang kechi inyakdir inyakaka party nükjiongtem, tangatetba aser tesayuba asoshi temulung agüja inyaktsü ayongzü.

"Tsüngremit mulunga, nübortemi amalitepa aser Chief Minister tasü aitba ajanga regional political party ana ka küma lokteptetogo" ta Achumbemo-isa ashi.

Iba sentong nung mendenji Working President, NPF Ahovi Zhimomi liasü, NPF Working President H Chuba Chang-i tesentepertem pelaa agizük aser Phom Baptist Church Pastor Rev. Phomlee Van-i temoatsü meshia sarasadem.

Indian Navy atema CMS-03 satellite yokogo



New Delhi, November 2, 2025

(Agencies): Indian Space Research Organisation (ISRO)-i Deobarnü Satish Dhawan Space

Centre nungi linük nung yanglutetba communication satellite taretiba khaketa yokogo. Tanü nikongdang 5:26 ako

meta Sriharikota, Andhra Pradesh nungi seret 4,410 taret CMS-03 satellite anünglaki khaketa yokogo. Iba satellite dang 'Bahubali of Indian rockets' ta tenüng jaloktsüogo.

CMS-03 dang GSAT-7R ta-a ajar aser iba ya Indian Ocean nung Indian Navy atema communication network nung tongtoret ama asütsü.

Iba satellite nung C, extended C, aser Ku bands dena multi-band payloads lir aser item ajanga warships, submarines, aircraft, aser shore-based command centers tsüngda high-capacity voice, data, aser video transmissions sütettsü.

WCH lenirtemi Minister Jacob Zhimomi ajuru



Dimapur, Yimpoksüi/Nov. 02 (TYO): Western Chakhesang Hoho (WCH) lenirtemi Western Area nung Chakhesang nunger aser Naga nunger ajungtsü asoshi ken o balala jembitsü atema November 1, 2025 nü Minister, PHED, Jacob Zhimomi den ajurutepe liasü.

Iba senden nung WCH-i Western Area nung aliba Chakhesang nunger dak kongshiba tebilemtsü lematep aser Minister teyari aser shisatsü meshia liasü. Minister-i Chakhesang nunger tejakleni aotsü aser terenlok asoshi shisatsü tajung agüja liasü.

Minister Zhimomi-i parnok dang Naga nunger timtem balala ajangba indang lemsatep aser yimjung nung alitsü nungdaker ta shia liasü.

Senden temulung süa mena anatsülen nungi tarutsü nung maneni teka amteper inyaksü tebilemba lemsatepe liasü.

CM Rio-i Vicky Sakhrie asükhu lemsatep

Dimapur, Yimpoksüi/Nov. 02 (TYO): Taoba Nagaland minister asür Dr. H Vizadel Sakhrie kinungtsü Vicky Sakhrie tanü, November 1, 2025 nü asüba osang angazüka kanga sasar, ta Nagaland Chief Minister Dr. Neiphiu Rio-i sangdong ka nung ashi.

Asür Sakhrie ya taremsük, temeim aser aria bilemba agi sünger aliba tetsür ka liasü. La ya kinungtsü, tetsü aser tetsü

(grandmother) tajung ka liasü. Pa kinungbo yimten yimsüsüba nung aliba tepiyong ka ya tongtipang nokdang liasü. Tsüngrem akumtsüboba tetsür ka, lai lar tanurtem dang ajemalutsü aser temeim sayutsü angazükdaksü, ta CM Rio-i ashi.

Lai tazüng yutsüba ya kodanga mesüngdaksütettsü, saka lai mapa tajung jenti inyaka yutsüba kodanga

mamatettsü.

La tamang aser sarasadem yimyatem ajanga la meteta alirtem maneni ajungmesotsü. Tang iba ama mangyimba mapang ni aser ozü kibongi asükhu lemsateper aser tulusang Tsüngremi tesuneptsüba agütsütsü sarasademtsür. Asür tanüla teti tesunep nung anisüngzükjangma, ta Nagaland CM-i ashi.

Zuketsa nung Multi-Speciality Free Medical Camp agi

Kohima, Yimpoksüi/Nov. 02 (TYO): Phek district nung Pfutsero sub-division kübok Primary Health Centre (PHC) Zuketsa nung Multi-Speciality Free Medical Camp ka November 1, 2025 nü ayongzüka liasü. Iba sentong ya District Hospital Phek ajanga Zuketsa Area Public Organization (ZAPO) den lungjemer ayongzüka liasü.

Iba camp nung doctor 19 den Medical Team nungi ketdangsür 21 arua yaritepa liasü. Iba camp nung surgical cases denseam shiranger 809 anepalua liasü.

Iba camp nungya specialists temi temang reprangba den mozü angati agütsü, surgical procedures, family planning, dental procedures, USG screening, ECG, NCD, diagnostic lab, physiotherapy, Ayushman Bharat Health card aser eye screening amala facility agüja liasü.

Iba camp nung 16th Pfutsero Assembly Constituency nungi MLA, Dr. Neisatuo Mero aden aser pai doctor tem den tayongzükba o jembia liasü.

Maka-maiter aser nungdakbapur nem health services agütsüba atema pai

Medical team dang pelaba shisem aser yimdaklir tem dang anema alibaji rongsen ta ashi aser temang anepalua alitsü ajungshia liasü.

Paia danga doctor tem den külemi shirangertem temang repranga liasü.

Iba sentong ya Kedoutsolhi Wetsah, president, ZAPO lenisüba kübok agi aser Dr. Wemer Khutsoh, Sr Medical Officer, Phek ajanga metetbela mapang agia liasü aser Hüvesalü Yoho, Pastor, Zuketsa Town Baptist Church ajanga sarasadema liasü.

Yingli College nung 'Yutopia Fest' ayongzük



Dimapur, Yimpoksüi/Nov. 02 (TYO): Yingli College Longleng nung October 28-31, 2025 anogotem 'Yutopia Fest' ayongzüka liasü, kong saisapong aser sobaliba benjong munga liasü.

Iba sentong nung kaketshir temi tejangraba tulu nung toktepa liasü. Kasa mapang Talent Extravaganza nung kaketshir temi sempet balala sayuba den guest artist Anglong Kongyak, Manchai Phom aser

Chingnyi Phom nungeri nungeri shilem agiba ajanga campus sangwatsü.

Yingli College nung Yutopia Fest ajanga temeim, telungjem aser lanurtem tanüla tali asendenshidaksü.

Yingli College nung 'Yutopia Fest' ayongzük

Dimapur, Yimpoksüi/Nov. 02 (TYO): Yingli College Longleng nung October 28-31, 2025 anogotem 'Yutopia Fest' ayongzüka liasü, kong saisapong aser sobaliba benjong munga liasü.

Iba sentong nung kaketshir temi tejangraba tulu nung toktepa liasü. Kasa mapang Talent Extravaganza nung

kaketshir temi sempet balala sayuba den guest artist Anglong Kongyak, Manchai Phom aser Chingnyi Phom nungeri nungeri shilem agiba ajanga campus sangwatsü.

Yingli College nung Yutopia Fest ajanga temeim, telungjem aser lanurtem tanüla tali asendenshidaksü.

DC Chümoukedima-i project balala semdang

Dimapur, Yimpoksüi/Nov. 02 (TYO): Deputy Commissioner, Chümoukedima, Polan John, NCS den ketdangsür temi October 31, 2025 nü New Socunoma nung Chathe ayong aser rashia aoba ayongtem nung mining area tem semdanga liasü.

DC-i Chathe ayong nung

riverbed mining indang jenjang kanga jangja asadang.

Iba sülen DC aser ketdangsür temi New Socunoma nung railway over bridge tang teyangludak aliba semdanga liasü. Maneni parnoki Tzhuma Bridge aser New Chümoukedima Bridge semdanga liasü.

Deputy Commissioner Mon-i metetdaksür

Dimapur, Yimpoksüi/Nov. 02 (TYO): Home Department, Nagaland ajanga metetdaksüba ama, Mon Sadar, Mon district kübok Leangha yimtsüng tenüng Loung yimtsüng ta melener, ta Deputy

Commissioner, Mon ajanga sangdong ka nung ashi.

Tang nungi tenzüka tongtepratep ajak nung iba yimtsüng tenüng Loung ta amshitsü, ta sangdong ajangasa ashi.

Kisama nung Kuki Union Kohima-i Chavang Kut benjong amung



Advisor Imkong L Imchen-i Bamboo Hall, Naga Heritage Village Kisama nung November 1, 2025 nü Chavang Kut benjong nung jembidang tangokba noksa ka yangi angur.

Dimapur, Yimpoksüi/Nov. 02 (TYO): Kuki Union Kohima-i November 1, 2025 nü Bamboo Hall, Naga Heritage Village Kisama nung "Unity through Culture" omen kübok Chavang Kut 2025 benjong munga liasü.

Iba benjongmung sentong akhumdong, Advisor, Information and Public Relations, Soil and Water Conservation, Government of Nagaland, Imkong L. Imchen-i jembidang, Kuki kin dak maitsü balaka lir aser sobaliba tajung lir ta ashi.

Taoba mapang Athibung Circle nung lendong atalokba aser tang Manipur nung mepetmesü adoka aliba bilemteta iba ama azüdokshi lendong tanaben majurutsü imlar, ta pai ashi.

Yimjung alitsü asoshi ozüng tesashiba nungdaker, ta pai ashi.

Simon Commission mapang nungi region yimten yimsüsüba tsütsü Kuki nungeri shilem tulu agia arur, ta pai ashi.

Pai Mim Kut aser Chavang Kut benjong indanga tongmelang agi rateta ashi aser

Kisama nunga sentong kanga junga ayongzüktetogo ta tenünsang agüja liasü.

Sentong tenzüka Rev. Khupma Hangsing-i sarasadem aser Chavang Kut Committee convenor Paokeng Sitlhou-i pela agizükba o jembia.

Paokhokam Singson-i Chavang Kut benjongmung rateta ashi aser Hentinlun Vaiphei, Joint Secretary, Kuki Union Kohima ajanga Küki Cha Kahiue ketdangsüa liasü.

Iba benjongmung nung KSUK St. Joseph College Unit ajanga sobaliba tsünsang ka agi shilem agia liasü aser Thanggoumin Haolai-i temeja ken ka aten.

Sentong tembanga Doumang Sitlhou, Chairman, Kuki Union Kohima-i melepzüng o jembia liasü.

Iba benjongmung nung Angami Public Organization (APO), Kohima Aor Telongjem, SAYO, Sumi Union, Konyak Union Kohima, Nagaland Mizo Welfare Association, aser Zeliang Union Kohima nungi lenirtem dena liasü.



November 02, 2025 nü Bihar kübok Arrah nung assembly election atema nüboyim sentong ka nung Bihar BJP Tir, Dilip Jaiswal aser Ato kilonser, Narendra Modi na adenba noksa nung angur.

Linük terenlok atema tetsürtemi shilem agitsüla: Droupadi Murmu

Haridwar, Yimpoksüi/ November 02 (Agencies): Amongnü linük Tir, Droupadi Murmu-i, 2047 küm tashi nungbo India ya terelok linük ka akümtsü atema tetsürtem densema senso ajaki amalitepa inyaksü nüngdak, ta metetdaksü.

Patanjali University convocation sentong nung jembidang Murmu-i, shisaliok tsütsü tetsürtemi tongtimbang shilem agidar, ta metetdaksü.

Laisa, Patanjali University nung azünger kaketshirtem shilem 62 bo tetsürtem lir aser tang graduate asürtem rongnung shilem 64 tetsürtem lir, ta metetdaksü.

Medal angurtem rongnung teburtem dang nungi tetsürtem pezüben agi teimba liasü, aser iba atemaji Tiri tetsürtem nem

tenünsang agütsü.

"Iba ya statistic dang masü, saka iba ya ajanga tetsürtem lenisüba kübok terenlok India yangerba temaitsü sayur. Akhidang Gargi, Maitreyi, Apala aser Lopamudra nunger ama tetsürtemi shisaliok aser yimsü tsütsü tongti shilem agia liasü," ta lai ashi.

India nung nütsüng billion 1.4 nungi nütsüng shilem 50 bo tetsürtem lir, aser linük aintsü atema tetsürtemji kanga tongtimbang, ta lai ashi.

"2047 küm tashi nung India ya terenlok linük ka akümtsü atema jala-jabasotem ama asenoki akok tashi shilem agitsüla. Teburtemi temaba jenjang atongdang tetsürtembo tesülen atsüngzükra terenlok India nükjidongji mataloktsü," ta

lai ashi.

Patanjali University-i Yoga, Ayurveda aser naturopathy ajungkettsütsü atema inyakba atema tenünsang agüja Murmu-i, India nunger akhi sobaliba kümzüksü aser wazüka ayutsü atema iba university-i tongtimbang shilem ka agidar, ta metetdaksü.

Kaketshirtem den jembidang lai, nenoki iba university nung azüngtsü shimetba ajanga tanü asüng shisaliok aser India nunger sobaliba na sendakteptsür, ta ashi.

"Iba ama tesem tajung ka nung nenoki anguba shisaliok ajanga nenoki climate change densema alima nung teiblemtsü onük balala atema inyaktetsüsa nenok renema lir, ta ni tamang akar," ta laisa metetdaksü.

PM Modi ya Ambani aser Adani na nem anishidaksür: Rahul Gandhi

New Delhi, November 02 (Agencies): Amongnü Congress lenir, Rahul Gandhi-i, Ato kilonser Narendra Modi-i US Tir Donald Trump tsübuba dang masü saka pa ya business tetsüti kar nem anishidaksür, ta metetdaksü.

Bihar kübok Begusarai district nung election nüboyim sentong ka nung jembidang Rahul Gandhi-i, "Tekütsük tuluka aliba agi na tashitait mekümdaksür. Mahatma Gandhi reprangdangang, pa kanga tekongra liasü saka pai tashi tulu aliba British nunger madak takok angu," ta ashi.

"Ano külen asenok den Narendra Modi lir, aser pai pa tekutsük inch 56 lir ta mezümeküma jembir.

Operation Sindoor mapang Trump-i pa dangi call asüdag pa aoksa aser anogo ananü tsüngda Pakistan den rara anen. Pai Trump tsübuba dang masü saka Ambani aser Adani na nem pa anishidaksür," ta metetdaksü.

Congress lenirisa, 1971 küm US-i taoba mapang Ato kilonser, Indira Gandhi amokmerena liasü, saka lai metsübui kechi inyaksü tim'ar ibaji dang inyak, ta metetdaksü.

Vote angutsü atema Ato kilonser Modi-i ajak inyaksü, ta shia Rahul Gandhi-i, "Pa dang yoga exercise iang ta shira pai asana kar aitsü aser vote atemabo pai sabang nunga tsünsangtsü. Election anogo

tashibo nai kechi shidir pai inyaksü, kechiyong election tembangba sülenbo pai saklokba corporations atema dang inyaksü," ta ashi.

Bihar nung INDIA teloktep nem takok ngudaksüra kin kar atema dang masü saka ajak asoshi sorkar ka tentettsü, ta pai ashi.

Paisa, BJP aser RSS-i Karnataka, Maharashtra, Haryana aser Madhya Pradesh state tem nung election auya, ta tai tongloksü.

"Election Commission-i Bihar nung voters list nungi Mahagathbandhan teloktep pusemertem tenüng agienogo. Tamalen onoki iba kuliji agütsüogo, aser maneni kuli agütsütsü," ta paisa metetdaksü.



November 02, 2025 nikongdang Sriharikota nung aliba Satish Dhawan Space Centre nungi Indian Navy indang GSAT-7R (CMS-03) communication satellite ka khakettsütsü lia tangokba noksa nung angur. Indian Space Research Organisation (ISRO)-i khakettsüba communication satellite tulutibaji CMS-03 ya lir.

Bihar election nung NDA-i takok angutsü ta survey ajanga asadangtet

New Delhi, Yimpoksüi/ November 02 (Agencies): Taruba Bihar assembly election nung Janata Dal (United)-i aniba National Democratic Alliance-i takok angutsü, ta JVC Poll ka ajanga asadangtetogo.

Iba survey report ajanga ashiba agi, assembly menden 243 aliba Bihar nung NDA-i menden 120 nungi 140 tashi angutsü aser RJD-i aniba Mahagathbandhan teloktepi menden 93 nungi menden 112 tashi angutsü, ta metetdaksü.

Assembly nung largest party ji BJP asütsü; BJP-i menden 70 nungi 81 tashi angutsü, JD(U)-i menden 42-48 angutsü, LJP (RV)-i menden 5-7 angutsü, HAM(S)-i menden ana aser RLM-i menden ka mesüra ana angutsü, ta parnoki metetdaksü.

Mahagathbandhan teloktep nungi RJD-i menden 69-78 angutsü, Congress-i menden 9-17 angutsü, CPI(ML)-i menden 12-14, CPI-i menden ka aser CPM-i menden ka mesüra ana angutsü, ta kasa survey ajanga

asadangtet.

Prashant Kishor-i aniba Jan Suraj Party-i menden ka dang angutsüa akok aser AIMIM, BSP, aser tangartemi menden 8 nungi 10 tashi angutsü.

JVC Poll survey ajanga ashiba agi, Bihar nung voters shilem 33-i Tejashwi Yadav chief minister südaksüner, shilem 29-i Nitish Kumar maneni CM südaksüner, shilem 10-i Chirag Paswan CM südaksüner aser shilem 10-i Prashant Kishor CM südaksüner.

Kasa poll survey ajanga, NDA-i vote shilem 41-43 angutsü, MGB teloktepi vote shilem 39-41 angutsü, Jan Suraj Party-i shilem 6-7 angutsü aser party tilatemi vote shilem 10 nungi 11 tashi angutsüa akok, ta metetdaksü.

Bihar nung assembly elections shilem ana lemsar November 6 aser November 11 anogotem nung election agiba sülen November 14 nü votes azüngtsü.

Dularchand Yadav tepsetba ken o nung JDU candidate Anant Singh puogo



Patna, November 02, 2025: Jan Suraj Party nung inyaker Dular Chand Yadav tepsetba ken o dak sendakba nung Mokama menden nung JD(U) candidate, Anant Singh court ka matsügdangi anir aodang tangokba noksa nung angur.

New Delhi, November 02 (Agencies): Anogo ishika tejaklen Jan Suraj Party pusemer, Dularchand Yadav tepsetba ken o dak sendakba nung Patna police- Mokama menden nungi JD(U) candidate Anant Kumar Singh puogo, ta Amongnü Patna Senior Superintendent of Police (SSP), Kartikeya Sharma-i metetdaksü.

October 30 nü Mokama nung election nüboyimba mapang nung party ana tsüngda raratepdang Jan Suraj party pusemer, Dularchand Yadav asü.

SSP-i, Anant Singh den külemi pa den inyaksemer ana - Manikant Thakur aser Ranjeet Ram nunger puogo aser par asemprong magistrate matsügdangi anir aotsü, ta metetdaksü.

"October 30 nü candidates ana pusemertem tsüngda rara adoka liasü. Lung agi ontepba mapang nung aika yiru. Iba tatalokba sülen tasümgang ka angu. Asürji arrshi küm 75 Dularchand Yadav liasü. Telok anapronglai ken o benokba

sülen police-i iba tatalokba bushisügdang tenzü. Tenük kulitem aser postmortem report ajanga Model Code of Conduct alema inyakba jangjaogo. Item ajak ya candidate, Anant Singh lia atalok. Anant Singh puogo aser pa den külemi inyaksemer Manikant Thakur aser Ranjeet Ram nata puogo. Par asemprong magistrate dangi anir aotsü aser maneni bushisügdangtsü," ta SSP Patna, Kartikeya K Sharma-i osangbenertem nem metetdaksü.

"Nisung tepsetba ken o nung par asem puogo, aser tangartema aputsü atema mita odor. CID-ia iba tatalokba bushisügdang tenzüko," ta pai metetdaksü.

Iba tatalokba dak sendakba nung Honibarnü station house officers (SHOs) ana- Ghoswari SHO Madhusudan Kumar aser Bhadaur SHO Ravi Ranjan na mapa nungi anentsüogo.

Taküm Mokama Assembly constituency nung Bahubali nunger ana - Anant Singh aser Surajbhan Singh na tsüngda tokteptsü.



TIR YIMYIM YIMOBILEM (EDITRIAL)

DIMAPUR MONDAY, NOVEMBER (YIMPOKSÜI) 03, 2025

Delhi nungi shinga marur na ?

Center nung BJP teloki aniba government arur külen state ajak nung terenlok mapa shitak inyaka odaktsütsü asoshi kanga süoki ia inyakba sentong kaji state shiai ita shia Delhi nungi Union minister katibosa semdanga terenlok mapatem reprangtsü tenzükba mapa ya asütsü. Iba jagi Delhi nung mener telemtetba agiba aser reprangba dang masü saka Delhi nungi yokba sen shitak amshia terenlok mapa inyakbatem tsüngdong arua reprangba agi mapa shitak aser tajungba inyaker. Aji oda, iba sentong tenzüklibo Nagaland-ia Delhi nungi Union minister melentepa aruba nguogo aser tangashia angashiogo. Ajisüaka, joko kenpiga Delhi nungi Union minister aruba osang mangashir aser tamalen aruba tajanzüka mangur. Atangji, Guwahati aser Shillong tashibo Delhi nungi ita nung anabena Union minister melentepa aruba angur saka Nagaland nungi Naga nunger yimsüsür aser ketdangsertem Delhi-i aoba dak alaka Delhi nungi yimsüsürtem arubabo mangur. Ashi tang amai, Union minister kar dang arua Dimapur-Kohima lenmang dang masü saka Kohima –Tuensang lenmang aser Dimapur-Mon lenmang tsüngdong- tsüngdong oa reprangdaksünüa aiter. Kasaji, Dimapur nung state stadium yanglutor akaba nungi tenzükba Nagaland tesem ajaklen center nungi yokba sen agi inyakba mapatem repranga jajadaksüner. Aji oda, yashiang Delhi nungi Union minister Prahlad Joshi Guwahati tashi arua government mozü kitem, school aser jangotsü alemba mapatem repranga jajaba amaji Nagaland nunga aruagi inyakdaksüner. Kasaji, ano yashiang Union Minister Jyotiraditya M Scindia-ia Meghalaya tonga arua agi yangji terenlok mapa tapu balala inyaktsütsü asoshi sentong tenzükja aoba amaji Nagaland nung aruagi tenzükdaksüner. Atangji, Delhi nungi Union minister-tem Nagaland-i marubaji teinyaktsü aser tereprangtsü mapatem makaba agi asütsüa akok mesüra Nagaland memeimba agia asütsüa akok, koba südir sang, Delhi nungi Nagaland metongtetba tetezüji, Naga nungertem dak temeimtsü maketba agi nenok sünütsü sang ta ser toktsüba amai ka dang bilemer. Ashiko, taruba ita nung Hornbill benjong amongba sentong nungbo Delhi nungi Union minister-tema arua adentsüa akok. Tamalena Hornbill benjong nungbo ato kilonser Narendra Modia arua dener o tajung aika jembir ogo. Ajisüaka, benjong nungbo nisunga aser alijaka topur tajung dang angutsü, aji benjong tenüng nung tema merükmejuba agi topur junga angur asütsü. Ajisüaka, Nagaland telonglenbo Hornbill benjong amongdak Kisama aser Kohima amabo masütsü aser benjong temer külen Nagaland senotsü sentong tarulenbo mali ser teindoklen dang, sentsü madak sentsü bendenloka, 'abnormal deficit budget' nung küm tasen tenzüktsü. Ashiko, iba amai Nagaland senotsü aser terenlok jenjang mazüokteti ao nungbo, ita shia Delhi nungi Union minister arutsü melen CBI aser ED purtemang arutsüa akok ? Atangji, Nagaland-i CBI aser ED purtema arua alitsüa akok, saka BJP teloki aniba center sorkari nangzükba ama ita shia Delhi nungi Union minister melentepa Nagaland-ia arutsüla aser Nagaland tesem ajak semdanga jajatsüla. Shin nung ashiba ama, tapu tapu jembiyonga mengura mamanger aser angashibaji tiyazü asütsüa akok, saka anguba agi dang amangtsü. Aji oda, Nagaland government nung alirtemia Nagaland nung terenlok mapa takok ngua inyakdaksünüra ita shia Union minister kabosa Nagaland tonga aruagi terenlok mapatem repranga sentong atongtsüsa jaoktsüla. Tangbo aiben Nagaland nung atalokba sentongtembo, tsüngdong marui, Delhi nungi dang 'online' nung shilem agiba angur. Ibaji asenok asoshi kanga tekümdangtsü mapa lir. Asenokibo tangar tonga aruagi ashiba dena mangar, anungji online nungi dang sentong ajak atonga inyaktepba jagi Nagaland nungbo long tilakata memeyiptsü. Iba jagi tesüsa kecha meinyak ser Nagaland senpong tazüng akümtsü aser alijak nung kecha inyaka maka ai aser ayi meitsü. Ashiko, Delhi nungi shinga marubaji asenok asoshibo asenok inyaknütsü sademsadema inyaktsü mapang tajunga ta bilema alitsüa akok, saka asüng lendong tulu ajurutsüsa Nagaland tipmatemji yang nung jagi tenzüktsü.

OLEMSABANG

KITA CHIR

~ S.Aosüngküm Ozüküm

(Iba Yimdangjem otsü ya Tir Yimyim aser Bookipedia nati ayongba toktep nung Tanabuba takok jenjang anguba liasü.)

(Yashi adok nungi...)

Tapu - Asem

Meshisadangi Tetsüng Ajemok : La joko alima tasen ka nung jaja tenzüker ama pungmang ajak nung shiba nem lai la taküm sempet salateta agütsü; iba nisung to mangli sangwali nüklai arua kazüdang; la mulungjang tipmatemer aser ano pa kodang ajurutsü ta yongyaseter. Saka lai shiba shimtet iba nisung kibong akümba nisung asünung lai bilemba ama mapang ajak nung iba teburi la nem mapang peria magütsütet. Saka labo shi jabujariba nungi aahzükba sen agi la tebilemba ajak ataloka senzütsü yimya sübar asünungji; tebur ka den dang masü oda shiri la nem sen aser lai aginüba senpet agütsüdir item sülen anidaka la taküm jenjang mashilen amshitsü tenzük. Tapayutsüka ajaki nüksia aliba aierla to taküm yimya tamajungtiba nung tetsüng ajemoker mapang talangka nemzüaka, tang tashi lai la taküm jenjang raksaba yimdangi marur aser tarutsü nung kechi ataloktsüar meshisadangi lia odagi. Joko tangbo "Anümai" yimti nübur ajaki la libaliru aser jakla yimya tamajungtem temai adoka meteta kümdagi, kechiaser lai asangur aser kijung lanu tebur aika den medemer kümogo aser mapang ajak nung lai bilemba ama sen aser senpettem talubosa angur. Kodang yimti nung la osang temai adoka jembir, idangji lar tsürabur mapang talangka wangshiwangshia liyonga aruba to anülaanülaa reprangtsü tenzük. Kechiaser par jala tobur ajungba aser kechisarena ajak nung nungtugusüa jembia aruba to tangbo, "Metsü dak tanang samaadokba den saku" tesempatsü taküm ka aküm. Anungji oda tsürabura kechi nüki agiang mereprang, kechi narong agi anga meliteti par jala "Yimtina" taküm jenjang ali tur aremba osang angashia, joko tangar dang aakba agi kima yimdonglena sademsadema mesenzüi kidang dang mena lir. Joko par yimtak alima tesem balala nung atalokba otsü khenyongi mejembir, saka temeimtsü Yimtina taoba mapang aser tang la taküm jenjang asadanga jembidang anü alu memeteti süidaksür. Oda nisunger shisatsü kasa ali masüji kari kanga aria aser sasa bilemstsür, saka karibo tsürabur asüküm aser ngasangadamba mechi atakatem arur ta jembidagi, ano kari ashir, ya alimar yimya ka dang ta, ochi aser teyazü aika meyokteper olulu jembir.

Tapu - Pezü

Mashisa Aküm : Joko alima shi yimya ama, Kr. Yimtina, temang pezübelemba agi lai bilemba ama mesüi tebilemstsü ka agi tongogo. Kechiyong la anojungi tetsür tebur shi nung medemba tsütsülen karara tetsüng ajemok, kechiaser lar tsüraburi rongsen tali benpua sayuba yimya ajizüka laa rongsen nung temulung agütsüdang memeteti iba tia agi la menepadok nungji, teraksa agi meraksa akümtsü, tenüng tamajung agi tenüng tajung melentsü lenmang kanga mesüa kümogo, ano tsürabur aser kidangkimang asoshi Kr. Yimtina akhi ama tepenjem aier taküm shilua yanglushitsüji "Anüng nung petinu shibai petzüka bener alutettsü" ta ali nung mener shisa ramaa jembiba den sakudang aküm. Anungji la den shisa kaa tim lenmang ka tuyutsü aser tangatetba ka agütsütsü tasa bushiba mapang, saka tebuibo joko la takümji samanüra samaang, kümnüra kümang joko ozü jala taa majatsü ta temulungjang telunglen shisarama tzüchi nung asonger shir dangang kechiang mashi shisa amsa tia nung nüktzü aidokba manener. Alima nung tsüraburji tenük agi anguba Tsüngrem ta jembiba ya shitak sernung chirnurtemi aji mangateti pei sünütsü süa medendangi mashilen tetsüng ajemoker jajadang alima nung jepaka nüktzü malutsüsa tsürabur aser kinunger ajak nem maksü rongnunga maksü bendenlokja yimjak nung anak baloktsüba ngua yimer ajaki kanga sasar aser aria bilemstsür. Aji oda tsürabur aser aria bilemertemi lenmang aika bushitepaka Yimtina "Mashisa" kümer ita asem ajunger asünung la temang akhi ama pongpa pongpaa mesenzür, yimjak nung akhidang ama sasapelaa mejembir, ano taoba mapang ama temang renemkunem mesüi shisabulu jak dener aiben la kija takdang telung nung kazüba ngua tsüraburi la yimya balaka kümogo ta meteta aru. Aser bilemba amaji la tepok nung tanur bona lira aser takümji raksar lira kibong züngsem nungi jentoktsü aser senmanga kecha magütsütsü ta "langkotem shisatsü adensang" tebui yimjak nung sangdong. Temeimtsü jala Yimtina iba o angashia la mulungjang tata yuyur. Anungji lai tebu aser tetsü dang tatok meshia mensem ka mener, saka iba tongratep o jembitsür aser la temang mazüngi akümba osang tejangja ashir kata mali, la tiaji apu teraksa ka nung jajar mesüka lir. Bilemdangra tia taka agi tia maka akümla Kr. Yimtina tanur tetsü akümtsü mapang nenjunga arudagi. Iba ama tatsütep mapang ka nung lar sosem ka den la dak atalokba timtem aser la tebilemba ajunga saboka jembia kazüba mapang shisabulu khuret maremteti ola tashii adoka ajepba ngua tetsür jagi ashi, "Alima nung yamaisa ataloker, anungji na shisa tebulu akok tashi ni lenmang tajungtiba ka bushitsü" ta mulungsüngzük o kar ashi aser tarutsü anogotem nung iba shisabulu khuret ya memenui tepela agi melentsü ta shisa lemsateper senshi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Alima ajunga nung Sunday School anogomung amongba anogo, November 02, 2025 amongnü Nagaland nunga, talisa, ABAM kübok aliba arogotem nung sentong tajung agia mungogo. Iba anogomung sentong omen “ Kibubai Sayutsü” ta asüba nung amendaker Dimapur Ao Baptist Arogo (DABA) nunga Christian Education Ministry purtemi sentong tajung yanglua akaba mapang tanurtemi shilem agiba noksa kar yangi angur. DABA nung Christian Education Ministry kübok tesayur ajak agi 187-i tanur ajak agi 3209 dang sayur. (Dimapur, November 02, 2025).

Egypt nung Easter ya 'public holiday' asütsü temepishiba agütsü

November 02, 2025: Egypt nung lawyers aser yimsü balala amanger sensotemi Alliance Defending Freedom (ADF) International teyari agia Easter anogo ya official public sodi anogo asütsü atema temepishiba agütsüogo.

ADF International-i ashiba agi, Easter anogo ya public holiday asütsü atema temepishiba ka agütsü saka Ato kilonseri iba temepishibaji magizükba sülen lawyers aser sensotemi maneni kasa temepishiba agütsüogo.

Easter anogo ya public holiday mesangdongba ajanga linük nung Khristan million 10 nem temeden magütsür, ta parnoki metetdaksü.

Taküm April ita nung lawyers telok kati Cabinet of Ministers dang, Khristantemi pei kibong züngsemtem den külemi Easter mongtettsü atema iba anogo ya public holiday sangdongtsüla, ta mepishia liasü.

Parnokisa, sector balala nung mapa inyaker Coptic Khristantemi pei kibong züngsemtem den kulemi Easter memongteter; iba dak alia Easter anogo nung exam balala agir, ta ashi.

Temepishiba agütsürtemi, "Ibayongji Khristantem aikati iba anoogo nung tekülem

sentong nung shilem magiteter mesüra pei kibong den külemi iba anogo memongteter," ta metetdaksü.

ADF International nung Global Religious Freedom director, Kelsey Zorzi-i, "Easter ya public holiday sangdongba ajanga Egypt nung Khristantem million aikati Khristan yimsü nung temeshi anogotem rongnung ka kanga tetezü keta mongtettsü. Pei mapa, school mesüra mapa kecha nunga tetsükdaksü makai sademsadema iba anogo tetezü keta mongtettsü. Ibaji ajanga Khristantem temeden akhümtsübütsü," ta metetdaksü.

ADF International-i ashiba agi, Egypt sorkari Orthodox Khristmas aser Muslim nunger benjung densema yimsü dak sendakba anogo balala public holiday sangdonga lir, ajisüaka Easter ya public holiday masüba agi Khristantemi iba ama temeshi anogo ka nung pei yimsü benshitsü asü mapa inyaka amongtsüar telemtetba magiteter.

Tang Egypt nung nütsüng shilem 10 shi Khristantem lir, ajisüaka iba linük nung anogo shia Khristantem bendangshidanga züngshir, tenokdanangba balala benoker aser aikati sadoksadoka

tekülem magiteter.

Taküm January ita nung Open Doors International-i report ka ajanga Egypt nung Khristantemi reshikangshi ajangshiba osang tejangja metetdakja liasü.

'Egypt: Persecution Dynamics' ta ajaba report nungji yamai shia lir, "Ozüng shidak mebenokba aser ketdangsertemi Khristantem kümzüksü atema inyaksü memelungba agi talisa Upper Egypt nung mapang shia Khristantem amaker. Iba dak alia sorkari tashi tali amshiba ajanga Arogo nung lenirtem aser Khristantemi item ama tatalokba anema ola madokteter."

ADF International nungi Lizzie Francis Brink-i, "Iba linük nung Khristantemi Arogo tasen tenzüksü kanga tasak. Egypt ya Africa nung sobaliba aser puti otsü tera yanga aliba tesem süaka iba linük nung tamangertem aika maneni timtemer," ta metetdaksü.

"Egypt linük temzüng kübok Arrla 64 ajanga tamangba yimsü temeden agütsür, ajisüaka atangji nunbo yimsü temeden balalala nokdanger. Iba linük nung recognized yimsü asem - Islam, Christianity aser Judaism dang agizüker," ta laisa metetdaksü.

Franklin Graham-i Sudan nung nisung jenti tepsetba aitsür

November 02, 2025: Tawa Sudan kübok El-Fasher yimti nung sepaitemi nisung jenti tepsetba video aika rpokshiba sülen sayutsüngir, Franklin Graham-i item tatalokba sashia aitsüogo.

Franklin Graham-i, tekolak nung injang khalokja nisung jenti khasetba sülen tasü mang nangdena ayuba noksa aser video yimjak nung sayaba ya tim masü, ta ashi.

Taoba Hombarnü Sudan nung Rapid Support Forces (RSF)-i el-Fasher atsüngogo. Tesüiba hopta ishika tsüngda Sudan nung RSF-i iba region nungjagi Sudan Armed Forces meindoka liasü. Sudan nung RSF aser Sudan armed forces tsüngda rara tenzükba sülen nisung 40,000 dak tali

tepsetogo.

Bodhbarnü Sudan sorkari, RSF sepaitem yimti telungi aitba mapang nungi tenzüka tang tashi nung parnoki civilian 2,000 dak tali tepsetogo, ta metetdaksü.

Samaritan's Purse Tir aser sayutsüngir, Franklin Graham-i, "Iba ya Islam yimsü alia amangba noksa lir. Onoki küm 30 dak tali Sudan nung inyaka arur aser iba linük atema onok melung raksar," ta metetdaksü.

Franklin Graham-i, RSF sepaitemi inyakba mapatem ya Islam yimsü alia amanga inyakba kuli lir, ta ashi.

"Sudan nung nisung jenti tepsetdar ajisüaka alimai ibaji sendoker," ta pai metetdaksü. Tang Sudan tensa nung

ajemdaker Khristan melungtet telok Christian Solidarity Worldwide (CSW)-ia alima linüktemi Sudan nung rara nokdangtsü atema inyaksü ayongzüik.

CSW Tir, Mervyn Thomas-i, "El Fashier nung tatalokba osangtem ya taoksatsüka lir. RSF-i civilian mezüngmeshiba, reshikangshiba aser tepsetba ya tesüiba küm 18 tashi ataloka aruba tang ang jungkai adoker. Iba dak alia ozüng alema inyaksü asoshi RSF nung tanur aika shimoka aliba ya mamangteter," ta metetdaksü.

CSW-i alima linüktem dang nisung aika jena oa jenoka aliba Tawila jila kümzüksü aser region nung timtemba nüburtem nem teyari balala agütsütsü ayongzüik.

ANOGO ABEN TSÜNGREM DEN

TAOCHI AGI KÜMZÜK

"Kechiyong taochi agi tamang ajanga nenok kümrükogo; aser aji nenok pei sasai inyakba agi masü, saka aji Tsüngrem sempet." ~ Efesa 2:8

Trochi ta kodang südir asenoki aazükba taa anguba ka masil la angateti. Asenok taküm libaliro reprangra senok dang Tsüngremer yimli sayutsü malang saka senok dang odang Tsüngremi anogoshia yimlibilem sayuba dangji Tsüngremer taochi ta ajar.

Molumi chir alidang Tsüngremi alima aser idakji Asen meimchir taküm temenen nung asonger teshinem aliba meimchir odang meim nung Pai pa ajaso chir Yisu Khrista taküm tenla asen menen nungi alangzüksü soshi agütsü. Aser iba tenla ya aseni aazükba mapa ka masü saka Tsüngremi asenok Pa taochi agi kümzükba mapa ka lir.

Tand asen meimchirtem alimai yangluba tashi amer [slingrembo mali ama tashiyim mapa inyakteper. Tanü petalishi rongsen dak rangloker taküm pei sasa liteter ima pei sünütsü süa liteper. Adianu asenoki ya madokli asen meimchir ya poktetba oset ka masü saka asenok ya Tsüngrem mesükba nung Pai unglubatem lir.

Asen taküm pei sasa alir ta masü saka anogoshia Tsingrem taochi nung alir ta züngshia Tsüngrem den nogo shía jajatsü merangdi. Amen

CBCNEI-i medical study sponsorship application form agütsür

Yimpoksüi/November 02, 2025: Council of Baptist Churches in Northeast India (CBCNEI)-i sangdong ka ajanga ABC, ABCC, GBC, KABC, MBC aser Nagaland Baptist Church Council (NBCC) nung General Secretary tem aser Associate züngsemtem (ECM, MBK, SBC, ZBC, TBCU) dang MBBS, BDS aser B.Sc. Nursing indang Medical Study Sponsorship Application Form agütsüba osang metetdaksüogo. CBCNEI Medical Secretary, Dr. Kechongol Sophie-i sangdong ka ajanga, "MBBS, BDS aser B.Sc. Nursing indang CBCNEI Medical Study Sponsorship Application Form ji CBCNEI indang website: www.cbcnei.org. nung angutsü. Form alemba tatembangbuba anogoji February 28, 2026 asütsü aser form submit asütsü atema tatembangbuba anogoji March 06, 2026 asütsü," ta metetdaksü. "Tatembngbuba anogo süiadokba sülenbo application kecha magizüksü. Tejangrar candidates den akokba tashi iba osang ya lemsatepdaksüner," ta kasa sangdong ajangasa mepishia metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tongma**

(adv) teimbaka (more than half)

* Asen lima nung nübortem tongmaka sensaker lir.

Tongmelang

(adj) terasa aser tebenja mali (simple)

* Tongmelang nisungi chiyongtsüa tongmelang ka dang renemer.



Tir Yimyim

OLONG PAITEP # 7318

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü teubba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. tatsü - (3)
12. Tebur kidong aser zünga kasa tsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7317 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüingjem,
25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü, 21. Ano,
22. Onü, 23. Kua.

NAI-A YA METETTER

Hyderabad nung aliba Goglo Clinic ajanga "world's largest hair transplantation surgery" inyaktetogo. Dr. Venkat lenisüba kübok par expert team-i nisung ka dak 11,000 grafts transplant süteta liasü. Tang tashi nung session ka nung hair transplant grafts ji 6,000 aser 7,000 grafts dang süteta liasü saka Goglo Clinic-i ibaji ajatetogo. Iba hair transplantation surgery ya Grade 7 baldness patient ka dak inyaka liasü.

Gaurav-i Sarma dang "na Chuba masü saka kilir" ta ashir

Gaurav Gogoi-i osangbener den jempidang tangokba noksa angur.

Guwahati, November 2,

2025 (Agencies): CM Himanta Biswa Sarma-i pa sasa Chuba ta ajar saka onok ya nübor tenzüksüba kilirtem lir ta Congress MP aser Lok Sabha nung Deputy Leader of the Opposition Gaurav Gogoi-i ashi.

"CM Sarma-i olatem nembangtsünür saka onokibo

nübortemi sadoka

jembidaksünür. Pai nübortem nem tsübudaksünür saka onoki nübortem tetsübu melii lidaksünür" ta Gaurav-i ashi.

"Chief Minister-i tetsübu aser sorkar anema ola adokertem dang taochi mesayuba tensa ka

adokdaksüogo. Chichiba lenisübaji nübortem madak

yimsü asüba masü saka nübor tenzüksüba lir" ta Gaurav Gogoi-isa ashi.

Chief Minister Himanta Biswa Sarma-i Assam len anitsü metemsü ta Gaurav-i November 1 nü metetdaksü. "Gogoi ya bendanger tashi ka ajanga yutsüba Pakistani agent lir" ta CM Sarma-i ashiba sülen pai iba olen metetdaksü.

Sarma-i tashi samatsü tsübuba iba onük ajanga sayur. Asür Zubeen Garg indang tatembangba film Roi Roi Binale sayaba anogo nung pai iba osang metetdaksü, ta Gogoi-isa ashi.

"Yashi state ajungai Zubeen Garg indang film reprangba mapang chief minister-i iba olen jembiba ajanga pai sorkar tashi samatsü tsübuba sayur, ta pai metetdaksü.

Gogoi-i pa kinungtsü ajanga Pakistan den tesentaktep lir ta Sarma-i tai tonglokja arur. Gogoi kinungtsü ya British tsür lir.

Tripura Youth Congress-i cough syrup shibelenertem aputsü akhanger**Agartala, November 2, 2025**

(Agencies): Jirania railway station nung ozüing noktanga aliba cough syrup shibelenertem merenshitsüla ta Tripura Pradesh Youth Congress Committee-i takhangba agütsüogo.

Tripura nung sepaitemi ozüing ajanga noktanga aliba cough syrup indang bottle 1.07 lakh apu. Iba indang jenjang ya Rs 5.4 crore shi alang lir aser iba ajanga state nung narcotics shishilembaba tuluba akümba aser ozüing tesashiba nüngdakba sayur.

"K e t d a n g s ü r t e m i

bushisüingdang shitak masüba aitsür. Iba nung political tsütsü nungi meinprong alitsü aser smuggling network ya tashishitsü melii yimjak nung metetdaksütsüla" ta Youth Congress-i akhanger.

West Tripura kübok Jirania railway station nung tawa cough syrup shibelenertem ajak aputsüla ta parnokisa ashi.

Ozüing ajanga noktanga aliba cough syrup ya khu abenba train ka nung bena liasü aser iba dak sendakba nung nisung ka puogo. Ajisüaka bushisüingdang shitak masüba atema Youth Congress-i ola

adoker.

"Iba ya ketdangsübaren nung temulung magütsüba lir. Ketdangsürtemi tashishitsü melii aser mapang atakzüker bushisüingdang tembangtsüla. Iba smuggling network ya ruling BJP nübotemi kümzüka ayur aser iba ajanga state ajungalen drug traffickers tasü itdaksür" ta Youth Congress president Neel Kamal Saha-i ashi.

"Tripura nung lanurtemi ozüing alema drugs kanga bulua shibelenba atema tebilemtsü abener. Mapang shitak nung aibelenertem aputsüla aser merenshitsüla" ta paisa ashi.

Cachar police-i 'Operation Fake Doctor' kübok 2 apu

Guwahati, November 2, 2025 (Agencies): Assam nung Cachar Police-i 'Operation Fake Doctor' kübok bushisüingdanga arudang anogo ana tsüingda taila doctor ana puogo.

Osang tejangja ka angazükba nung ajemdaker November 1 nü police-i Supal Roy (42) apu. Pai Rosekandy

Tea Estate nung kulikaket tejangja melii doctor ka ama inyaka aru.

Iba tesem nung doctor's chamber ka yanglua liasü aser ketdangsürtemi pa anema bushisüingdang ka tenzükogo.

November 2 nü police-isa Indrajit Roy (39) ta ser nisung ka apu. Roy yagi E&D Colony, Tarapur nung aliba Maa

Ayurved nung shirangertem anepalua aru. Pa ya visiting doctor ka ta pai ashi aser pa anema bushisüingdang tenzükogo.

Osang tejangjatem angazükba sülen tenaprong apu aser maneni taila doctor tem jangjatsü atema bushisüingdang südar ta Cachar Police-i metetdaksü.



DoNER Minister Jyotiraditya M. Scindia-i Integrated Sohra Circuit Development atema lung azüingtsüba sülen agiba noksa ka angur. Iba mapatong ajanga Meghalaya nung Sohra ya multi-day experiential tourism destination ka ama akümtsü. Iba mapatong ya Prime Minister's Development Initiative for North Eastern Region (PM-DevINE) scheme kübok teyari agütsür.

Kenya anentsüh lendong nung nisung 21 asü



Nairobi, Yimpoksüi/November 2 (Agencies): Tzünglu kanga sashia aruba ajanga kenya kübok anüolen Rift Valley tesem nung anentsüh aludakja nisung 21 süogo aser ki 1000 dak tema raksatsüogo, ta ketdangsürtemi metetdaksü.

Kenya indang Interior Cabinet Secretary Kipchumba Murkomen-i X ajanga ashiba agi, lendong nung kanga mejungi yirur alir 25 temang anepalutsü atema Elgeyo-Marakwet County nungi tayimtsü nung Eldoret yimti-i anirogo, aser nisung 30 samar tang tashi bushidar.

Paisa, military aser police-i teyari agüja Deobarnüa maneni tekümsükba maparen inyakdar, ta shisem.

"Lendong agi kongshir alirtem nem chiyongtsü aser tanga oset balala tali agütsütsü atema inyaktepdar. Item osettem bener aotsü atema Military aser police chopper tem renema yua lir," ta paisa shisem.

Anentsüh ya Kenya anüolen Elgeyo-Marakwet County kübok Chesongoch tesem nung alu. Yimya aliba linük nung tzüngluruwa kanga tatsüka dang asür, saka iba tesem nung tzünglu kanga sashia arua liasü.

Iba tesem nung alir Stephen Kittony-i Citizen Television station dang ashiba agi, pa ola tulu ka angashi aser iba sülen par tanurtem den par ki nungi tugua tesem balakati jena ao

Kenyan Red Cross-i iba tesem anüng nungi tangokba noksa lemsatepogo. Noksa nung

anentsü tulu alur aliba aser tesem tulu ka tzü agi metsünger aliba nguogo.

Parnokisa, tayimtsü amshia yirur alirtem aninba densema sorkar den angatettepa tekümsükba maparen balala inyakdar, ta ashi.

"Lendong agi kongshir aliba tesem karibo aotsü kanga tasak lir, kechiyong item tesemtem tzü agi metsünga lir aser lenmangtema anentsüh agi nokdanga lir," ta parnoki X ajanga metetdaksü.

Chesongoch kübok tenem nung aliba tesemtem nung aiben anentsüh alur, aser 2010 aser 2012 küma anentsüh lendong nung nisung aika taküm samaogo. Iba tesem nung 2020 küma shopping centre ka tzümetsüng agi aponger oa liasü.

Russia-i missile amshia amakba nung Ukraine tanurtem dena asü



Kyiv, Yimpoksüi/Nov. 02 (Agencies): Ukraine tesem balala nung nisung toku tepset aser aika yiru, koba Russian sepaitemi anünglen nungi amakba ajanga lir ta parnoki ashir.

Ukraine linük Dnipropetrovsk region nung aliba ketdangsür temi Deobarnü ashiba agi, Honibarnü Russia-i tayimtsü amshia amakba mapang dokan ka nung mi adoka arishi küm 11 aser 14 tanur ana densema nisung pezü asü.

Southwestern Odesa region nunga Russian jets nungi trucks aser danga gari nung bomb poklokja nisung ana tepset aser asem yirutsü, ta Ukraine ketdangsür temi ashir.

Kherson nunga Russian sepaitemi drone, artillery aser anünglen nungi nisung aliba tesem 20 dak tema amakba nung nisung ka asü aser ana yiru, ta Governor Oleksandr

Prokudin-i ashi.

Cluster warhead aliba Iskander-M model südi ta ketdangsür temi bilemba ballistic missile ka Mykolaiv jila nung tsüka arishi küm 20 tain tebur ka tepset aser tanur densema nisung 19 yirutsü.

Front-line Zaporizhzhia region nunga Russia-i settlements 18 nung tenük yoker amakba nung civilian ka tepset, asem yiru aser ki raksatsü, ta Governor Ivan Fedorov-i ashi.

Maneni iba tesem amakba ajanga nisung meyrirjang aika power raksatsü. Nisung 60,000 jungnüa power mali aser emergency crews temi tensa ajungba sülen yanglushitsü, ta Fedorov-i ashi.

Ukraine indang national energy operator Ukrenergo-i linük tesem ajunga nung blackouts alitsü aser ibai Russian missile aser drone amshia energy facilities amakba

ajanga lir, ta sangdong.

Kasa mapang Ukraine-ia Russian sepai aser ki o jen nung amaker. Russia indang Ministry of Defence ajanga ashiba agi, par air defences ajanga Honibar aonung Ukraine indang drones 164 anüng nung lia raksatsü aser itemji Black Sea nung 39 aser Crimea nung 26 liasü.

Ukraine indang military intelligence-ibo Russia indang mitkar indang logistics kanga sashia akoksaja Moscow region nung Koltsevoy pipeline nung amak, ta ashir, koba 400km talang lir aser yangji refineries nungi gasoline, diesel aser jet fuel agütsür.

Ramensky district anasa totzü abenba line asemprong raksatsüogo ta parnoki ashi. Moscow nungi iba indang sangdong kecha agüja mali.

Black Sea tükum anasa Ukraine indang drone kati Tuapse jila nung amakdang tanker ka aser oil terminal pier ka raksatsü ta Ukrainian media-i ashir.

Linük ana ya Pokrovsk yimti asoshia kanga sashia rarater, koba Moscow-i anüdoklen Donetsk region ajunga agitsü merangba nung tongtipang shilem ka lir.

Honibarnü Russia-i Ukrainian special forces aika helicopter nung iba yimti nung arua anendang tepset ta ashir, saka Ukraine army ketdangsür temi aji magizüker.

Trump aser Syria lenir al-Sharaa taruba hopta ajuruteptsü

Washington, Yimpoksüi/November 2 (Agencies): United States Tir Donald Trump aser Syria indang interim lenir Ahmad al-Sharaa na November 10 nü sensaksem ka asoshi ajuruteptsü, ta Damascus dangi Washington indang envoy-i metetdaksü. Syria nunger Tir kati tang mezüngbuba US yimtiba semdangtsü lir.

Syria dangi US envoy Tom Barrack-i Honibarnü Axios osang kaket dang ashiba agi, US semdangba mapang ISIL (ISIS) telok anema US-i aniba international telok ka nung Syria adentsü atema al-Sharaa-i sign asütsü imlar.

Syria nunger source kati ashiba agi, Tir-i taruba hopta ana tsüngda US semdangtsü imlar, ta Reuters news agency-i metetdaksü.

Bendanger lenirtemi US semdangba indang US State Department-i mangaoka yua aliba nung tang tashi nung Syria nunger Tir kati danga Washington semdangba mangaoka mali.

Al-Sharaa shibai taoba küm December ita Bashar al-Assad atsüngtoka liasü, pai al-Assad yimsüsüba mapang Damascus sentoker aliba linüktem den tesendaktep yanglushitsü merangdar.

Pai May ita Saudi Arabia

nung Trump ajuruogo, koba küm 25 tsüngda linük ana nungi lenirtem mezüngbuba ajurutepba liasü.

Gulf Cooperation Council nung lenirtem den ajurutepba mapang tena ajurutep aser iba ya Syria asoshi kanga tongtibang ama züngshir, shirnok Assad'er kibongi küm 50 dak tema yimsü asüba sülen tang inyakyim aser libaliro melenshiba mapang lir.

Al-Sharaa-isa, September ita New York nung United Nations General Assembly nung o jembia liasü.

Syria dangi US envoy Barrack-i Bahrain nung osangbenertem dang ashiba agi, US-i anir 2014 küm nungi ISIL den rara aruba telok nung Damascus-a dendaktsütsü Washington nükjidong lir. ISIL yagi 2014 aser 2017 küm tsüngda Syria aser Iraq na nung tesem aika atsünger liasü.

Al-Sharaa-i mapang ka nungbo Syria nung al-Qaeda den sendaka aliba telok ania liasü, saka küm ter tejakdang pai aniba Assad anemba telok ya Osama bin Laden-i ngutetba telok nungi atsüingin aser iba sülen ISIL den raratep tenzüka liasü.

Al-Sharaa atema mapang ka nungbo USD million 10 sempet agütsütsü nangzüker liasü.

Mexico supermarket lendong nung nisung 23 asü



Hermosillo, Yimpoksüi/Nov. 02 (Agencies): Mexico northwest tsütsü Sonora state kübok supermarket ka poksaba lendong nung tanur densema nisung 23 asü aser 11 yiru, ta yangji aliba ketdangsür temi ashir.

Iba lendong ya Hermosillo yimti nung aliba Waldo store nung Honibarnü atalok.

Sonora nung aliba prosecutor indang office ajanga ashiba agi, iba lendong ya tia maka atalokba südi ta bilemer aser stor telung nung aliba transformer ka bushisüngdang.

Yangji aliba public security ketdangsür temia ibai civilian dak tenük yoker lendong agütsüba masü ta ashi.

Sonora Governor Alfonso Durazo-ia video message ka nung lendong ajurur aika tanur lir aser takum jenburtem Hermosillo nung aliba mozüki ka nung anepaluogo, ta ashi.

"Iba lendong atalokba jangjatsü asoshi kanga junga bushisüngdangtsü totuyuba agütsüogo," ta Durazo-i ashi.

"Nisung shingaia kisüing agi iba tejashi mabentsü. Tetenzük

nungi emergency, security aser health services temi bendanga agütsür yaritepa tensa azüoker aser nisung takum kumzük," ta governor-i ashi.

Mexico Tir Claudia Sheinbaum-ia social media X nung asür kinungertem den asükhü lemsatepa liasü.

"Nüngdakba nung teyari agütsütsü asoshi ni Sonora governor Alfonso Durazo den osang agiteper. Kinungertem aser yirur alirtem yaritsü atema support team yoktsü Interior Secretary Rosa Icela Rodriguez nem totuyuba agütsüogo," ta lai ashi.

Iba supermarket tejaklen mi agi rongsar aliba noksa tem media nung prokshioigo aser kijiba jaksar liasü.

Lendong ya nikongdang 2:00 ako (par mapang) meta atalok aser mi prokshia modaktsütsü mechi anasa aliba businesses tem kishi shibanga ayu ta osang ajanga ashir.

Hopta tatemlen Mexico nung Day of the Dead anogomung munger alidang iba lendong ya ataloker, kong kinunger temi pei kinunger aser adianu sür aliba bilemteter.

India-i Australia den tasembuba T20 asaya kokogo



Yimpoksüi/November 2, 2025 (Agencies): Deobarnü Hobart kübok Ninja Oval nung India aser Australia na tasembuba T20 asaya India-i walyeypongu agi kokogo. Parnoki Australia-i run 187 yangluba menepa liasü.

Asaya nung Washington Sundar-i ball 23 nung out mesüi run 49 yangluba aser tanga batsmen temia teyari agütsüba ajanga India-i iba asaya ya koka kasasa kümogo. Australia team tang mezüngbuba iba tesem nung T20I asaya ka nung tamakok nguogo.

Australia pur batting amenba mapang Tim David-i ball 38 nung run 74 yanglua parnoki ajak senteper run 186 yangluba nung teyari agüja liasü. Marcus Stoinis-ia ball 39 nung run 64 yanglua team nem teyari tulu agütsüogo.

Run arishiba mapang

Nathan Ellis-i run 36 agütsür wicket asem agia India team nem timtem agütsü, ajisüaka India team-i ball teku anunga lia target tongteta asaya kokogo.

India team batting amenba mapang Abhishek Sharma-i ball 16 nung run 25, captain Suryakumar Yadav-i ball 11 nungi run 24, Tilak Varma-i ball 26 nung run 29 aser Axar Patel-ia ball 12 nung run 17 yanglua liasü. Jitesh Sharma shiba iba asayamung nung tang mezüngbuba asaya liasü paia ball 12 nung out mesüi run 22 yanglu.

Asaya nung Josh Hazlewood maliba ajanga India team ajangzükogo. Australia nung bowler tem rongnungi Ellis dak alaka tanga asayartemi India nung batsmen tem nem kangabo timtem magütsüi liasü.

India team bowling aonba mapang Arshdeep Singh-i ball

kanga junga ona Player of The Match award angu. Pai Travis Head aser Josh Inglis na kanga kara out süja liasü.

Ajisüka Tim David-i Jasprit Bumrah aser Varun Chakaravathy na densema India nung bowler tem ajak merenshi four six aika züka liasü.

Bowler tem rongnung Shivam Dube-i David aser Stoinis naprongla dangi ball junga montet aser Abhishek Sharma-ia over ka ao saka run 13 yangludaktsü.

Varun Chakravathy-i, Mitchell Marsh aser Mitchell Owen naprongla out süja India team jenjang junga kümdaktsü. Asaya tatemlen Arshdeep Singh aser Jasprit Bumrah napronglai run kanga junga aziükteta ball ona liasü.

Team ana ya maneni November 6 nü Gold Coast nung pezübuba T20 asayatsü.

Kewhimia U-15 Kene Championship takok ngua asayaogo

Kohima, Yimpoksüi/November 2 (TYO): Kewhimia U-15 Kene (Wrestling) Championship November 1 nü Pele Khezhe Indoor Stadium, Kohima yimtsüng nung kanga takok ngua asayaogo.

Iba asayamung ya Bout Lords-i ayongzük aser Kohima Village Youth Organisation (KVYO)-i teyari agüja liasü.

Iba asayamung ya Bout Lords nungi Tournament Management Director Khriesazo Liezietsu lenisüba nung asayamung lapokba sentong ka agiba sülen tenzüka liasü.

Sentong nung KVYO Tir Er. Medozhazo Rutsa-i lokti pela agizükba o jembi aser Shalom Bible Seminary Assistant Professor Kevidzenyü Rutsa-i Tsüngrem temoatsü meshizüka sarasadema liasü.

Sentong nungsa Rüdielhounuo Sekhose aser Pfulikhrie Keretsü nati special performance ka agüja liasü.

Asayamung nung shilem agitsüpurtem ya KVYO Secretary Kene-i ketdangüsü tenangzüktepa agi.

Asayamung ya Kevisetuo Kire-i akok aser pa sülen tanabuba jenjang nung Meguolhou Sote liasü. Maneni

tasembuba aser pezübuba nung Keneiphretuo Kire aser Menguvor Khezhe na liasü.

Asayamung nung takok angurtem nem senpet, takok marok agütsü, koba KVYO Vice President Mhasimhalie Mathew Yhome-i sponsor asü.

Asayamung shibangba sentong ya KVYO Games & Sports Secretary Viliebeizo Liezietsu lenisüba nung agi.

Maneni sentong nungsa NASA Wrestling Meet 2026 (Group-A) atema shimba asayartema sangdonga liasü.

Bout Lords Managing Director, Kezhalelie Keretsü-i tepela o jembia liasü.

Asayamung nung takok angurtem nem sempet ya Kohima Municipal Council (KMC) Councillor Vimhalie Pienyü aser Kelhousenuo Khruomo na, ASA Vice President (Adminstration) Neisavotuo Whuorie aser taoba mapang KVC mendenbuba Medoselhou Keretsü nungeri agüja liasü.

Quarterfinalists ajak aser asayamung nung shilem agir ajak nem senpet agütsüogo.

Iba den bendenloksema Kelhousenuo Khruomo-i champion nem sen 5,000 talila agüja liasü.

Nagaland university nung mezüngbuba TT asayamung asayaogo



Dimapur, Yimpoksüi/November 2 (TYO): Nagaland University Students' Union Lumami (NUSU-L)-i ayongzüka November 1 nü Lumami campus nung Table Tennis (TT) asayamung ka kanga takok ngua asayaogo, kong tang mezüngbuba kaketshir, faculty aser staff tem külemi asayaogo. Iba asayamung ya campus nung Table Tennis asaya ajungkettsü nükjidong nung Multi-Purpose hall nung asaya liasü.

Asaya nung tebur aser tetsür kija aser tarep asaya aser tarep temeyoktep asaya densema liasü.

Category balala nung takok angurtem:

Tebur kija asaya:

1st Kitoho

2nd Rokovotso Nagi

Tebur tarep asaya:

1st Peter Ki aser Japhet Kihimi

H yeptho

2nd Daniel aser Paul

Tarep temeyoktep asaya:

1st Peter Ki aser Kekhrievonuo Rome

2nd Rokovotso Nagi aser Gwanglungzeule

Tetsür kija asaya

1st Kekhrievonuo Rome

2nd Ngiplong S Konyak

Tetsür tarep asaya

1st Kekhrievonuo Rome aser Gwanglungzeule

2nd Ngiplong aser Vandana

Asaya ajanga asayartemi parnok sempet tajung aser sportsmanship sayuogo. Asaya kanga toktepa jangradema asayaba sülen category ajak nungi takoker aser runners up nem senpet agüja liasü.

Asayamung shibangba sentong nung Dr. Monalisa Tase, Asst. Prof. Political Science alakteta jaoker liasü. Sentong nung o jemibia mapang Dr. Tase-i, tang mezüngbuba iba amala asayamung ka ayongzüka asayaba atema NUSU-L nem tenüngsang agütsü aser iba ya otsüsütsü mapang ka ta ashi.

Laisa, saisabong ya luyim balala rognung ajak dang taziükba tajungtiba aliba luyim ka lir, aser iba ajanga akümtsübuttsü, atasa-a inyakttsü, aremzükttsü aser sportsmanship sayur, ta ashi. Lai asaya balala nung shilem agitsü koda tongtibang iba indang lemsatet. Military training den medemdanga jemibia mapang lai, saisabong nung temzüng ozüing aser tetsükdaktsü aser timtem liaka tanen makai inyakttsüba densema lir, ta ashi. Dr. Tase-i, makoktsü ta bilemer tenzüka tebilemba kodanga malitsüla aser takok tashi tajungtiba asayatsü merangtsü ayongzüka liasü.

Sentong nungsa NUSU-L Tir Toito V Zhimomi-i, tepela o jembi aser pai asayar aser terpranger ajak dang parnoki shilem tajung agiba atema pelaba lemsatetpa liasü. Paisa, iba asayamung ya NUSU-L inyakyim tasen ka tetenzük asütsü ta ashi.

Williamson T20 asaya nungi anisüngzüker

Yimpoksüi/November 2, 2025 (Agencies): Taoba mapang New Zealand captain Kane Williamson-i pa T20 internationals asaya nungi anentsü telemtetba agiogo aser ashiba agi, iba ya pa aser par team atema mapang shitak lir.

Arishi küm 35 tain asayar ya December ita West Indies den Test asem asayatsü aliba nung asayatsü lir aser pa maneni one-day international aser T20 franchise cricket bo asayatsü.

Pai T20 asaya 93 nung run 2,575 yangluogo. Pa indang average 33.44 aser strike-rate 123 lir. New Zealand nung rongnung Martin Gupitill-i dang pa dang nungi run (3,531) timba yanglur lir.

Captain ama Williamson lenisüba nung New Zealand pur 2021 küm T20 World Cup final tonga asaya saka parnoki Australia makok. Iba asaya nung pai run 85 yanglua liasü.

"Iba ajanga team nem tarutsü aser taruba T20 World Cup atema ken o jangja kümdaktsütsü," ta Williamson-i ashi.

"T20 asayar tajung aika lir aser parnok asayadakja World

Cup atema renemshidaktsütsü kanga tongtibang lir," ta paisa shisem.

"Mitch [Santner] ya captain aser lenir tajung ka lir. Tang Black Caps pur iba format nung tejakdangi anir aotsü asoshi par mapang lir, aser nia talang nungi team nongita yaritsü," ta pai shisem.

T20 World Cup ya India aser Sri Lanka na nung February ita asayatsü.

Williamson T20 nung mezüngbuba 2011 küm asaya saka pa 2024 küm June ita nungi masayai aruogo.

Pa ya New Zealand nung rongnung batter tajungtiba ka ta aikati züngshir. Pa ya Test nung run timtiba yangluba asayar aser ODI nunga pezübuba nung lir.

New Zealand Cricket chief executive Scott Weenink-i ashiba agi, Williamson ODI aser Test asaya nungi pa mulungka nung anentsü atema pai aazükogo.

New Zealand-i England den ODI asaya 3-0 agi kokogo. Iba masüdag parnoki T20 asayamung 1-0 agi mekoki liasü.

BILEMDANGANG

"Tatem maka lima asoshi akümlidang renemang."